

Asasagut Naalakkersuisut, asasagut borgmesterit, (asasagut anaana aamma ataata), asasagut inersimasut,

Unikallalaaritsi, oqariartuutigullu tusarnaarlugit. NAKUUSAp 2022-mi Meeqqat Ataatsimeersuarneranni Kalaallit Nunaat tamakkerlugu meeqqat 43-t Meeqqat Isummersorfiineersut katersorpaat. Tassani, nunatta siunissaasugut, Kalaallit Nunaanni silap pissusiata allanngoriartornera eqqartorparput. Eqqartukkagut maanna oqalugiaatinngortippagut tusarnaarnissarsilu kissaatigaarput.

Pissuserisartakkat allanngortinnissaat, uagut meeqqattalu inuuffissaqarnissaat, inuit tamarmik akisussaaffigaat. Immitsinnut ikiornitsinni ikiortigut. Ataatsimoorluta nukittunerussaagut.

Sooruna uulia, ozonimi putunik alliertortitsisoq, silaannatsinnullu ajoqutaasoq, taamak annertutigisoq atuinnaripput? Sikusarnera kingusinnerujartuinnarpoq, sermersuaq aakkiartorpoq, Kalaallit Nunaata Kangiani Piteraqaq sakkortusiartuinnarpoq, tamannalu assersuutigalugu uumasunut pinngortitarsuatsinnullu kinguneqarpoq. Bussit angallatillu innaallagiartortut atorsinnaavagut, biilinillu mingutsitsiinnarata cykelersinnaavugut pisuinnarlutaluunniit. Sooruna erngup anorip immallu nukingi innaallagissiornermi atornerunngikkigut? Sunaana utaqqiinnaripput?

Silap allanngornerujussua annilaangaginerpaavarput. Sunamita tullinnguutissava.

Sooruna aqqusinerne eqqakkat sumi tamaaniiginnartut? Ulluinnarni eqqagassanik igitsineq ajornanngikkaluarpoq. Pinngortitarsuarput maanna najugaqarfigisarput kinguaassatsinnut aamma misigitikkusoqaarput, taamaammallu eqqakkanik minagutsikkusunngegalugu. Illoqarfinni nunaqarfinnilu eqqaaviit amerlineqarsinnaapput maangaannaq eqqaajunnaarniassaagut, nalunngilarpummi eqqakkat tinngussaagaangamik immamut pisartut. Nunatsinni sumiiffinni assigiinngitsuni eqqakkat iliuuseqarfigineqareerput, assersuutigalugu Itillimi najugallit tamarmik akisussaaqataallutik Itilleq sapinngisamik minguitsuutippaat. Tamatta taamaassagaluarput.

Iliuutsigut allanngortinniarlugit akisussaaffimmik tiguisariaqarpugut immitsinnut ikiorniassaagut.

Sooruna eqqakkat immikkoortiterneqarneq ajortut? Eqqaavissuarni ajornartorsiuterpassuit pinngitsoortissinnaavagut eqqakkat immikkoortittalerutsigit akisussaassuseqartumillu ikuallaasalerutta. Eqqaavissuit inissaaleqisarneri iliuuseqarfigisinnaavagut ikuallassinnaanngitsut, soorlu savimerngit, biilikut, errorsivikullu allamut inissittarlugit. Eqqaavissuarmi ikuallaanerup kissarnera illunut kiassaataatitut aamma atorineqarsinnaagaluarpoq. Taava CO2-mik aniatitsineq annikillissagaluarpoq.

Silap pissusiata allanngoriartornerata iliuuseqarfiginissaa suleqataaffigerusupparput. Suleqatigiinneq nuannaartitsisarpoq, pilluaammernartarpoq tulluusimaarnartarlunilu.

Sooruna pigisatsinnik atoqqiinerunngitsugut? Pigisat atorunnaakkat allat iluaqutigisinnaavaat. Atisagut nutartersinnaavagut torraasunngortillugit. Atorunnaakkat eqqumiitsuliarisinnaavagut. Atisanik paarlaattarsinnaavugut pigisagullu atorunnaakkagut pisariaqartitsisunut tunniullugit. Taava inoqatigut aamma ikiussagaluarpagut.

Nunarsuarmi sapinngisamik meeqqat pitsaanerpaamik alliertornissaat kissaatigaarput. Taamaammat ikiortiseraassi.

Sooruna nerisassat taamak amerlatigisut igiinnarneqartartut? Nunatsinnut akisuvoq mingutsitseqataallunilu. Innuttaasut nerisanik atuinertik pisiniarfiillu nioqqutissanik pisiortornertik eqqarsaatigilluartariaqarpaat. Nioqqutissat qaangiuttuulersut akikillineqarsinnaapput, tunineqanngitsoortullu meeqquerivinnut, ilinniarfeqarfinnut, angerlarsimaffeqanngitsunut, utoqqarnut, timersortarfinnut allarpassuarnullu tunniunneqarsinnaapput. Nunatsinni inuppassuit pissakilliortut nerisassat taakku iluaqutigissaqaat. Inunnut tunniunneqarsinnaanngitsut qimminut nerukkaatigineqarsinnaapput.

Immitsinnut paarigutta ikioqatigiillutalu mingutsitsinngikkutta inuit akornanni nuannaarneq, tulluusimaarneq qujamasunnerlu pilersissinnaavarput.

Nunatsinni nukiit pioreersut sooruna atorineqarnerunngitsut? Uumasut, ileqqut, nerisassat, nukiillu nunatsinneersut atornerugutsigit assartuilluni nunatsinnut eqqussuinnginnerussaagut. Sumiiffinni assigiinngitsuni nunatsinni pigeriikkagut nerisinnaavagut, sanaartorlugit pilersillugillu. Nammineerluta ileqqugut atorutsigit tulluusimaarnarlunilu pilersitsinermi nuannaarneq misigissavarput.

Taamaammat asasagut Naalakkersuisut, asasagut borgmesterit, asasagut meeqqat inuusuttullu – silap pissusiata allanngoriartornera iliuuseqarfigisigu?

Iliuuseqannginneq periarfissaanngilaq. Nalunngilarput iliuuseqanngikkutta silap pissusia pitsaanerulernaviannngitsoq. Akisussaaffimmik tiguserusuppugut nunaqqatigullu kaammattorusullugit peqatigaluta akisussaaffimmik tigusissasut. Nunami maani ikioqatigiillaqqeqaagut – aamma silap pissusia pillugu ikioqatigiissaagut.

Ataatsimoorutta nukittunerussaagut.

Qujanaq tusarnaarassi – maanna iliuuseqassaagut – Kikkulluunniit iliuuseqaqataasinnaapput!!